



ATASSUT

UKA 2016/101

Steen Lyngge

10. 10. 2016

Danmarkip naalagaaffiata inatsisaata tunngaviusup § 42-ni ikinnerussuteqartunik illersuinissamut aalajangersakkamut aallaaviatigut naapertuuttumik Inatsisartuni inatsisissatut siunnersuummik akuerineqarsimasumik, pisut aalajangersimasut ataasiakkaat minillugit, Inatsisartuni ikinnerussuteqartunit minnerpaamik ilaasortat pingajorarterutaannik amerlassusilinnit innuttaasunik taasititsissutigineqarsinnaanissaanik aalajangiisoqarsinnaanissaanik Naalakkersuisut UPA2017-mut inatsisissatut siunnersuusioqullugit peqquneqarnissaanik Inatsisartunut aalajangiiffissatut siunnersuut.

(Inatsisartunut ilaasortaq Peter Olsen, Inuit Ataqtigiit)

Atassut-mit siunnersuuteqartoq Peter Olsen, IA qutsavigissavarput siunnersuummut soqutiginantumut.

Tamat oqartussaaqataanerannik inuiaqtigiit pitsaasumik ingerlanneqaraangata, amerlanerussuteqartut aaliangigaat kisiat aallaavigalugu ingerlatsisoqarneq ajorpoq. Tamat oqartussaaqataanerat tunngavigalugu naalakkersuinikkut ingerlatsissagaanni, ikinnerussuteqartut tusarneqartarnissaat tunngaviusariaqarpoq.

Tamat oqartussaaqataaneranni tusarneqarnissamut periafissat assigiinngitsuusariaqarput. Nunatsinni tusarneqarnissamut periafissat atuuttut assigiinngitsuupput.

Periafissat ilaatigut taaneqarsinnaasut tassaapput, peqatigiiffeqarnissamut aammalu kattuffeqarnissamut kiffaanngissuseqarneq minnerunngitsumillu tusagassiutitigut imaluunniit inuit internet atorlugu attaveqatigiittarfiini innuttaasutut ataasiakkaatut, peqatigiiffittut imaluunniit kattuffittut oqartuuteqarneq. Taakku saniatigut oqartussaaqataanermin pingaarluinnartut periafissaq tassaavoq qinigassanngortissinnaaneq aammalu qinersisinnaaneq.

Siunnersuuteqartup siunnersuutigaa Inatsisartuni ikinnerussuteqartunit minnerpaamik ilaasortat pingajorarterutaannik amerlassusilinnit innuttaasunik taasititsissutigineqarsinnaanissaanik aalajangiisoqarsinnaanissaa.

Siunnersuuteqartup siunnersuuteqarnerminut tunngavigivaa Danmark-imi Folketing-imut atuuttoq Folketing-imi ikinnerussuteqartut taasititsinissamik piunasaqarnissaminut tunngavigaa, Grundlov-imi aaliangersagaq paragraf 42.

Danmark-imi aaliangersagaq qanoq atorneqartigisimanersoq qivaraanni, takuneqarsinnaavoq 1953-imiilli Grundlov allanngortinneqarmat 15-iaannarluni atorneqarsimavoq. Grundlov paragraf 42

ikinnerussuteqartunit toqqaannartumik tunngavilersuutigineqarluni 9-iaannarluni atorneqarsimavoq. Qimerlooraanni suliani suni paragraph 42 atorneqarsimanersoq, takuneqarsinnaavoq paragraf 42 atorneqartarsimasoq inuiattut oqartussaaffiup allamut imaluunniit amerlanerusunut tunniunniarneqaraangat .

Naalakkersuisut akissuteqarnerminni ilaatigut ilisimatitsissutigaaq siunnersuummi pineqartoq siusinnerusukkut qaqinneqartarsimasoq, soorlu ilaatigut namminersorluni oqartussanngornissamut ikaarsaarnissamut sulinermit marloriarluni apeqquq qaqinneqartarsimavoq tapersorsorneqaranili. Tamatigullu amerlanerusut aaliangigaat aallaavigalugu sulineq atuutiinnassasoq aaliangerneqartarsimavoq.

Atassut-mit siunnersuutigineqartoq siunissami tunngaviusumik inatsisissamik pilersitsinissami sulinermit ilanngunneqarnissaa inassutigissavarput.

Taamatut oqaaseqarluta Atassut-mit siunnersuut tapersinngilarput.